

翁于安

鐵公祿

菴德山

年政事

譜錄蹟



于公德政錄

戴兆祚編輯

中華書局

于公德政錄

叢書集成初編所選借月
山房彙鈔澤古齋重鈔及
指海皆收有此書版本同
借月在先故據以排印

于公德政錄

德政頌并序

古虞老民戴兆祚編輯

縣令親民之官。明君必重其選。漢世循良高第。輒擢爲京兆馮翊。馴至三公九卿。五代之季。世胄之子。至恥爲之。則令之輕重。關國之隆替。可不慎歟。當今庶政維新。民欣願太平。而奏銷令下。武健嚴酷者。鴟張吾虞巖邑也。濱海控湖。賦役牟於他省。巨慙積蠹。如林而伏。一遇事端。所在蜂起。其民如治亂絲。如篆驕子。寬猛兢絃。調劑爲難。況脅於大吏。拘謹者不得行其志。卽敢爲之士。每多傷夫掣肘。前朝理煩治劇。稱耿清強。自好稱楊。而一以墨敗。一以戾聞。蓋綜核不潔。武健多冤。識者病之。新朝如湯。如魏。有愛人之心。尙人之氣。稍欲展布。白簡已隨其後。杜祁公之戒門生者。良有以也。嗚呼。爲令難。爲虞令尤難。歷年二紀。更十有二姓。而升遷者寡。詿誤者衆。其間繫民懷思。一二人而止耳。亦未見有能竟其用者。天憐我虞。福星下降。康熙戊申。三韓于侯諱宗堯。字二巍。以世家子。年弱冠來宰吾邑。拔民水火之中。登於衽席之上。五載恩膏。與山俱崇。與湖俱深。民則蘇矣。公其痛矣。上蒼降割。德星隕矣。萬口慟公。身莫贖矣。青峰白日。永埋玉矣。豐碑矗立。比峴首矣。老民涕零。而作頌曰。

維侯之怙。宣力寰區。政成兩粵。壯志克抒。侯也繼武。卓絕碧餘。綺貂執袴。視之蔑如。藏器待試。天子曰俞。

厥考盡瘁。朕念藐諸畀以大邑。來宰吾虞。藏鋒斂鐔。留侯之顏。英風簌簌。終賈之年。披卻導駭。肯綮鞏然。提綱挈領。民解倒懸。運弁屠民。江河之東。雖有成法。棄如飄風。狐鼠憑藉。窟穴其中。公愛我民。務鋤其兇。執法如山。孰敢撓鋒。公威既張。鬼蜮潛踪。大吏心懾。服公之公。凡所條畫。俯首聽從。漕政既釐。歲省萬鍾。催科煩擾。墨深酷烈。係繫圓扉。血殷肉決。從朝徹莫。悲號慘切。公灑甘霖。救焚解熱。返我田廬。流亡再集。民曰父母。需索永絕。昔委泥沙。今我朝夕。正供二億。加耗三之。私派日增。弊端孔滋。上下囊橐。以飽其私。公悉蠲除。還爲民脂。公乃春陽。所照甦活。膝前唱喏。溫言和說。女有冤抑。我爲剖別。女有困苦。我爲解脫。撫摩痛痒。遐邇胥悅。雨過而耕。月明無懼。公也白玉。不憚磨涅。飭紀振綱。豈風凜鉞。敵蹤黃金。浣躬日月。壁立萬仞。馨香四徹。上下陋規。自公而絕。亦有豺狼。吞噬搏攫。公既至止。涎螭入殼。鷹化爲鳩。慈祥可卜。亦有狡狐。穿簾入幕。公既降臨。茅艾蘭茝。比戶絃歌。樂公之樂。肺石無冤。廷尉家傳。桎梏罕用。訟簡刑寬。庭無婦女。閨闔矜全。鰥寡孤獨。罕見株連。極備極無。呼籲勞心。涉彼洪波。以急災氓。禱祠必誠。捐恤必均。晝夜焦勞。大凶不禳。妖誕罔干。酣賭禁嚴。豹也作令。神欽鬼遷。一弛一張。幽明不愆。非無佻傚。董之師儒。亦有窶貧。食之餼糈。掩骼埋骸。枯骨澤之。設粥設藥。放岐兼之。爰有淑媛。迨吉改絃。公庭花燭。偕老百年。彼狐綏綏。棄禮視顏。冰心鐵面。舊染胥倭。未耜利而媚優拙。胥皂鮮而農賈喧。五稔政成。萬口歡傳。昔憫今安。奚啻無襁而有袴。童吟叟頌。咸願祝禱而祝年。是以猛虎渡河。麥秀兩歧。中牟何忝。漁陽罔岐。佇見考績上最。帝念勞臣。入參帷幄。出作干城。方期上繼先猷。下濟萬民。何圖纔製美錦。遽赴修文。哀哉哀哉。

公之方正廉能。慈祥樂易。能避虞山億兆蒼生之命。不能保一身鶴算之延。民也羣聲徹天。羣淚徹泉。淒入肝脾。哀感頑廉。儼音容之如在。窈芳骨於山巖。芍坡梧櫟。叔子峴淵。兩袖清風。徑去千秋俎豆綿延。公乎歸來。庶幾騎鯨跨鶴。永翱翔於琴川拂水之間。

某虞之廢氓也。生平不解譽人。生貴人且不肯譽。況故令乎。因身罹達璞之虐。燄。

前令體四達、李璞

焚炙鏹磨。

棄產棄屋。貨井臼之婢。嫁有出之妾。器皿與綈袍俱盡。鬚眉與顏面齊捐。易青蚨以黃卷。如遭秦火。罄簪珥于白梃。慘類濁流。血肉既盡。尙未足以饜餓虎之腹。飽走狗之囊。其中苦情苦境。不深嘗不能悉其味。今日泚筆頌公之德。亦猶墮地獄之後。置之樂土。政恐復墮地獄。故永矢勿諼耳。詞雖煩而無溢美。無飾說。可以質之通國。告之天下後世而無慚也。庚申十月朔日。永錫翁自識。時年七十有二。

治績纂二十五則

行官兌

虞邑僻在海陬。非絡繹孔道。其民柔軟逸樂。鼎革之後。生齒仍繁。富者田連阡陌。奢華靡麗。其次擁十家之產。營生樂業。小民終歲勤苦。能置田數畝。亦無慮饑寒。然無不急公奉上。以圖寧靜者。自前明漕政大壞。而大家小戶。靡不破碎。五米十銀之令。勒諸豐碑。徒具文耳。悉其顛末。而後知吾侯改兌之大功。虞民雖捐踵頂。鏤肌骨。不足以報也。吾邑糧田一百六十萬有奇。輕白漕共計二十二萬有餘石。糧憲駐節其地。總督四府之糧。而十四郡之窮奇樛杌。皆根株窟穴于其中。每朝廷明旨之便於民者。輒爲沉擱。沮廢陰陽。而把持之。是以官收官兌之法。頒之二十餘年。他邑奉行。而常熟則否。其弊至於官民交困。雖仁愛如湯。精強如魏。卒以漕累去。莫能更改。條分縷析。細數之難終其物。邑之糧艘五百抵縣。脩脰或五或十。有常輸矣。諸役倉蠹。有常規矣。鋪墊經費。有尅減矣。紳豪憲差。有隆殺矣。大約相爲表裏。高舉一縣之兌。例而烹分之。不魚肉良民。以滿貪壑不止。有司恤民。則惕以督撫之威。而悍卒呼宿猾忿迫於竣事。無可奈何。終束手以聽其不肖者。相與爲首尾。而鬼蜮其間。運弁如虎。旗丁如狼。胥役如蝸。穀價昂。每石兌費有七八錢者。價下則又貪米。每石有加至一倍以外者。小民自開倉後。卽赴倉守候。至春夏開幫。半載之中。剝膚敲骨。吞肌吸髓。得保全性命。已爲不幸中之大幸矣。相沿二十餘年。民力盡矣。當事者置若罔聞。世家大族至輸子女於弁。貧者逃亡。存者株連。而死于杖。於獄。於枷。若若也。自愛者赴湘。投繯。服毒。又比

比也。始也金錢。金錢盡而器皿。器皿盡而屋廬。屋廬盡而墳壙妻女。而命亦隨之。以故沃產價值。每畝十金。此時不值半兩。稍瘠者無人過而問焉。有千金之產。虛立賣契。且盛設華筵。拱手送與勢豪者。有敵蹤其世業而甘作他鄉之鬼者。民之視田如罟獲陷阱。去之惟恐不速。而豪右奸猾輿援刁頑傾險之徒。反因此居奇壟斷。發迹起家。□□□□□□□□。嗟乎。一兌缺而囚繫者數十口。一戶亡而牽連者數十家。此莫非朝廷山河之赤子也。誰受牛羊之牧。而顧若是之弗省歟。我侯未出京。而已稔知其詳。既到任而首以官兌爲急。問諸紳廉。紳廉弗辦也。詢諸里老。里老畏縮也。謀之佐貳。佐貳瞠目矣。點者惟恐其法之成。愿者欲其成而莫能助。而不知侯已控於漕司。籲於督撫。無弗首肯而贊成其決。于是計貯官糧。先計官廩。總若干米。須若干廩。覆者造。圮者葺。厚板下鋪簾。棧四周計費若干。酌派均勻。以賣之八十五區之甲。催曰。此外更無以煩爾曹也。視費多寡爲高下。或一戶脩幾廩。或幾戶脩一廩。令出如山。人皆悅服。糧多者竣事。糧少者亦竣事。善良者急公。剛暴者亦急公。豪紳擅佔者舉不得而私。而往歲脩倉之弊革。兩衙用賕以謀管糧。而責償於民。每甲責賕二兩三錢。或一兩一錢五分。謂之雙官錢。單官錢。而生事孽芽。炙詐不資。侯以一身任其勞。而一概謝絕。而官錢之弊革。十銀明示成色。自封投櫃。收書必擇醇謹老成者。准斛平授。五米之外。不許私浮升合。米色則輪牙僧公看。人皆帖然。而措勒之弊革。舊染相沿。每區必有經催扇轡。每場必有承牌走倉報數。分立名色。恐嚇百端。侯一切禁革。但用甲催一名。總催五甲之糧。事畢寧家。絕無他擾。而唆使要挾橫擾守候之弊革。每官必有大叔。轎夫。傘夫。門子。常川柵門。各項糧戶。

到倉。蜂擁攢詐。若蟻噬羶。侯立三百觔大枷。犯者必懲。亦莫或敢犯。而需索之弊革。又有鼓樓公廳斛斗站船各項。皆每年之搖錢樹。公裁以正法。量給清俸。以酬其勞。而指官假借之弊革。倉夫盜米。其積習也。手滑或至四五十石。兌缺則責糧戶賠墊。有冤莫愬。公令甲催分番值宿。收書用心看管。又命內丁不時巡察。使之無隙可乘。而盜米之弊革。往時米既入倉。各憲轅役謀差盤驗看米。不飽其欲。糧戶必中奇禍。官兌既行。無與民事。侯又恐波及收書。先牒各憲曰。米數不足。米色不佳。責在縣官。無煩憲使驚擾。而看米之弊革。至於派兌之胥。上下其手。幫衛善惡。改兌有無。開兌後。先一視賄之厚薄。爲撥派。官兌既行。挨次而放。安用派胥。而派兌之弊革。糧戶應役。郭內郭外。前倉後倉。餛飩麵店。酒肆茶坊。肉山酒海。悉各役之貪饕。債小民之膏血。侯立法嚴禁。無敢開張。卽糕糰糖担。亦無敢入倉者。而酬飲之弊革。民兌時有見。而開廠喜錢米色。踢斛淋尖。押花會籌折匾。話衛算帳。折東後手。完狀網巾。圈種種名目。卒吏相爲表裏。勒索無厭。官兌行而悉化有爲無矣。角斗甬正。權概出入。均齊正米。五米隨兌隨完。官十私贈。隨兌隨給。倉無留米。軍無留兌。始也軍譁而民亦疑。終也民悅而軍亦歡。總計官十之外。每石私費不過九分。而漕事竣矣。較前之銀至八九錢。米至一倍以外者。其相去爲何如。兌完之後。節縮有餘。分之兩衙。頒之收書。井及斛手。羅夫各役。咸使飽仁者之粟。而不陷貪夫之罰。予聞公初出京。先謁漕司。卽懇以民兌之苦。官民交盡。漕司付以嚴檄。臨期張掛。許以梗法者解司嚴處。公又持之甚力。于是僉壬風靡。萬夫氣奪。而官兌行矣。非智勇兼全。謀斷獨克。何以能此。然不謂于十九歲之初任遇之。此常邑廿萬生靈之命之當甦。

也。能勿下誰嗣之淚哉。

革火耗

損銀脚解已編入會計中。完銀火耗。前朝不過每兩二三分。鼎革以後。墨如瞿令。亦不過八九分。而巡方白簡已議之矣。自後累年日滋。康熙三、四、五、六年。每兩加至二錢五分及三錢。通邑皆輸。誰能爲之諱。大約正供幾二十萬。加耗五六萬。亦未必盡入縣官之囊。或曰。縣官主之。而各衙門瓜分之。吾不知其說也。當完銀時。收吏虎踞於櫃。執戥而喝曰。少。則增。再曰。少。則又增。見其囊罄。則曰。若真不曉事。是可止完票銀若干。糧戶吞聲不言。索票疾走。輸青蚨以換截票。而虎差已怒罵其遲。多不及比者。不及比。又多收吏渾身綾羅。佳扇珍佩。異香苦茗。羅列左右。而嬖女。嬖童。博具。酒席。已預設某處矣。小民白銀一兩。完不及八錢。米銀一兩。完不及七錢。每石米值不過三錢八九分。完不三錢。民安得不凍。不餓。不欠。不逃。不血肉狼籍。累及妻子也。公蒞任後。既點櫃書。問曰。每兩加耗多少。答曰。一任老爺分付。公曰。我酌其中。每兩八分何如。吏少之曰。一錢。吏又少之。明日大張曉諭。特示糧戶。火耗止於五分。一依司頒法馬。自封投櫃。吏不得假手。櫃吏收銀一千。則量給幾兩。補其紙筆之費。民固蘇息。吏亦晏然。蓋表正則影直。上廉則下法。歲省民金錢以數萬計。

嚴假命

詞訟之興。吳俗尤健。角口小忿。輒駕命詞。一俟批發。則主文。該房。承牌。籤差。區皂。干證。地方。四鄰。尸親。蜂

攢被告之家。計資而烹。富者則五尖嘴十破靴。當時管閑事紳之別名。憲役訪蠶。豪奴鵠起。蟬集扛幫。紮詐。能者猶可與之稍辨。弱者恐懼畏縮。但欲保身。必至傾家而後已。究竟十命九虛。誰肯爲之直其冤者。公不輕准。輕繁。輕訊。輕相。輕檢。涉疑似者。必反覆論息。誣者重懲。且懼以反坐。而人亦不敢以人命輕嘗矣。其保全善類。豈可量哉。有錢敷著者。富甲西北區。公初到。有以真命誣之者。錢未知公淺深。懼甚。空費三四百金。投海防廳遮蔽。公徐爲覓讞。破網洗冤。杖警原告。一時有青天之頌。而防廳實未爲之關說也。公死而敷著助銀買地留葬。宜矣。

省詞訟

詞訟之設。本以伸冤理枉。不肖有司。反用以通賄枉法。而民之冤更甚。若兩司撫道衙門。皆有神棍盤踞。生殺在手。呼吸立應。然關提追攝。必由縣令。縣令者。諸衙門之總綸也。縣令清。則奸棍畏服。即各憲亦有所避忌。縣令貪。先授人以柄。而把持之。然後引首帖服。任其指揮。其害皆歸之於民。而其緣大抵皆起于詞訟。吳下刁風。吾邑爲甚。里巷睚眦之忿。輒駕詞誑。控前李令時。有衙役線索。股戶耳報。立准籤提。重則拘囚。必官吏皆悅而後已。否則枷肘拶夾。無所不至。假饒人身似鐵。其奈官法如爐。即賣妻鬻子。所不計矣。公到任後。見老幼之樸實者。引至案前。假以詞色。與之喁喁爾汝。人之情僞。無不預知。投文時。詞牒日以百計。必親批閱。真僞立剖。甚誑者懲及代書。抄粘示衆。如秦鏡高懸。照及肝膽。人人畏服。由是投牒者日少一日。至農忙則停。漕忙則停。歲暮則停。戶婚田土。決不輕准。即准亦不輕訊。必以情諭之。使息。婦女

不許牽涉。嚴刑罕用。而肺石虛懸。能畏民志故也。

除私派

私派之弊。始於瞿。烈於李。總其名曰飛差。雖嚴禁不止。其初各憲偶因公事。微行下邑。照田科辦。其後公然創立名目。上需者一下化為百。上需一時。下援為例。倉米則有經費。淮費。白折則有部費。條銀亦有部費。別有龍船。民夫。樂輸。標兵等。共幾廿項。卽如標兵一項。國初至今。相沿幾二十年。每一甲催必追銀二兩。浮費在外。統一邑計之。則五千金矣。他項縷縷。稱是。追比酷烈。甚於正供。公至則寂然不聞。若奉旨裁汰者。然後知已前官吏之侵漁者多矣。何無一人問及也。良可慨也。

寬比較

聞之父老。徵糧明辨。唯前朝耿藍陽。前後俱不能及。蓋常邑賦重役繁。冊籍充棟。不得不假手於吏胥。一假手於吏胥。則又奸弊叢生。而不可問矣。衣食其中者。總書。該場。貼書。輕糧。各項差役。共計八場。何啻二三百人。又有各衙該管。經承。坐催。提差。浸淫咀蝕。無不出於糧戶。指糧戶爲精衛。令填滄海。長此安窮。國初功令嚴切。帶比舊欠。至七八年並徵。至奏銷令下。紳廉生監。一概黜革。爲令者益武健嚴酷矣。縣中總書一名。八場該場。經承八名。先謀而後得之。既得則索賄者又蠅集。乃設法取足於糧戶。如空單。解頭。做起解比。看比。番供等。種種名色。無非納賄之法。此欠戶之累也。近年又開開追一門。波及花戶。并無田者。一經開追。關捕轉着。株連蔓引。如同圖同區兄弟。族屬姻親鄰佑。一單轉着。奇禍立至。拘提則有時。籤信

鐵、風火雷鐵、鴛鴦單、手提牌、硃單、如追捕盜賊所到之處、雞犬一空、刑法則有雙肘、單肘、捧柵、連鎖、連枷、繫獄、繫鋪、笞杖、夾拶、百姓驚魂喪魄、二門之外、拘囚繫繫、世裔窮儒、老嫗少女、黃童白叟、日夕呼號于桁楊桎梏之下、聲徹數里、甚且枷至封翁孝廉不欠糧之教諭、差單一出、臨比不到、則用鐵提、提到必重責、三四十板、或至拶夾、差受杖每板必炙至二錢、身受杖亦必索照料錢酒食之費、又在其外、提不到則拿差屬、差不得庇差、是以差亦多逃、而差之兄弟親戚、皆所不免、由此西北逃戶日增、高堂大宅、畫棟雕梁、轉盼卽瓦礫、貧戶盛而富戶亦盛、頑戶亡而良戶亦亡、輸重賂則有緩徵易新之法、徇情而則有憲役訪蠹豪僕諸人、良民戰戰慄慄、公差耽耽逐逐、官且融融洩洩、而逋欠歲增所不慮焉、古云、天之生財、止有此數、不在下則在上、今則不在上、不在下、一切正供、悉化酒食嫖賭之用、糧安得不逋、民安得不逃、無皮子遺之謠、塗歌巷議、而聞之者充耳自如、公於七年四月到任、拔本塞源、一塵不染、清節逼人、而解損之費、息法懲府幹、而需索之費、息暫緩舊逋、止徵新課、不差外差、僅用經催、而多差之費、息絕開追之門、無株連之苦、極頑下戶、杖不過二十、示辱而已、而照料酒食之百費俱息、見糧戶如家人、婦子溫言慰藉、痾癢關心、逃亡者免追、而公歲課所入、反加於前數倍、而尾欠甚少、何也、蓋往年酒食嫖賭之費、今悉以充正供矣、而又杖千總、而營欠清、仆官圖戢、責憲役而大蠹輸、其不畏強禦、撫字細弱如此、是以四年之中、流亡盡復、曠土日闢、刀山火坑、變爲滿目蓮花、安得不撫心泣血、臥轍攀轅、共作桐鄉之舉哉、余憶公初年遇一糧戶、鼓掌稱快曰、吾有麥八十擔、向年此時已悉被糧差分去、今悉糶以完官、皆是于知

縣所賜。又一人受杖而出。號呼拜謝曰。如此青天。杖亦甘心。豈虛語哉。

絕饋遺

饋遺。上下交征之郵也。賈荇刻起聲譽。紳衿胥役。蠅營狗苟。恆必由此爲傳送之門。而百姓乃其外府。故往日兩司撫憲之禮。有至千金者。佳辰令節。亦必費中人十家之產。雖甚狼籍。坦然無事。亦有委曲周旋。使之升遷去者。公巖巖氣象。使人望而畏之。而一以禮法自持。故上不病其傲。下不病其峻。貢殖之輩。望而咋舌。若惟恐盜聽餘財。汙辱良善。卽有贖貨如樂王鮪。亦勿敢逼叔孫而褊其帶也。

杜需索

木之蠹也。而後蟲生焉。人之不能忘情於我。因我之不能無欲於人也。公兩袖清風。播於遠邇。不唯親轄者。不聞多所需索。卽通家故舊。亦絕覬覦之心。此可以令人思矣。

正交道

邑饒紳廉。而蓋鮮子羽。龜毛兔角。皆撓乃公事者耳。倨者氣凌。黠者巧中。以物交物。膠葛緣染。類皆樂脂韋而醜正直者。公氣若秋蘭。神如秋水。向之杯酒竿牘。躡足附耳。暖賓賓之座者。如見紫眉。累心都盡。公家廷尉有曰。賢將不可干以私。公真其人。吾見五載以來。求交于公者。公曰。君房有是言。丹未之許也。

端士風

閔仲叔不以口腹累安邑。任棠以不言曉太守。虞豈有其人。投刺侯門。望見顏色。胥便袖中文牒耳。公視

事而寂然。堂有絳帳。庭無私謁。濟濟多士。咸兢兢自愛。如蓬生麻中。風斯尚矣。

瘞暴骨

掩骼埋胔。古有明訓。澤及枯骨。專美西伯。然西伯伯也。一縣令暇時幾何。省詞訟。急賦斂。候上官。守妻子。之不暇。奚事爲朽屍謀安妥。汲汲乎聚棄骸而掩之。掩之不已。且至再至三。此豈望其臨去。攀轅一慟。各上司具保留公呈耶。此而以爲迂闊。以爲要名。然則必如指困助漕。望尾拔富。而後謂之識時務。亟民事耶。常邑之中。有此無心肝者乎。其肉不堪喂狗。

賑饑荒

自古救荒無奇策。汲長孺矯詔發粟。富鄭公在青州設法賑濟。安撫流民。膾炙人口。然汲以戇直舊臣。富以大相出牧。故得行其志焉。可望之縣令。令至今日亦肝食矣。考成視乎督責。誰敢度外行事。使者奉宣德意。亦惟飲酒遊山而已。誰肯留心民瘼。公遇凶荒。設粥賑飢。處置周密。民迴溝壑之生。炊無徒手之嘆。實堪媲美前賢。惜無以其法下之各邑者。

急水旱

天災流行。國家代有。焚巫尪者。貽笑咸孫。夫非昧於人上之道與。今更異甚。順治五六年苦潦。縣吏科斂於民。必足二萬金。方得申憲題請。十八年苦旱。從事白令。若李。例至頂山龍湫禱雨。令大怒曰。叩首雨降。叩首若是神乎。請問常邑。吾田何在而動輒煩乃公爲其衙役。聞者無不掩口胡盧。公遇水旱。躋蹙涉

波。備歷諸險。如救頭目。然而申請之速。更不待言。何昔智而今愚。彼逸而此勞也。邑屋之徒。毋乃以是笑公。

救疾病

嘗百草之聖。能以方術療民。兩宋尙有濟民藥局。後此無聞焉。公曰。民我赤子。我民父母也。焉有赤子病而父母不爲之撫摩調治者。設藥局。延醫生。朝夕周視。而赤貧者遂少短歿。雖公之費有限。而公之意良厚矣。公能以心急民。民不能以身代公。民之隱痛。其有窮乎。

廣教化

九真祝良。西蜀文翁。能興起教化。俾蠶叢交趾。蔚爲名邦。而況虞山文學之里。然比年以來。裘馬風高。咕嗶衰止。父兄之教不先。子弟之率不謹。公以此爲民父母者之恥也。於東西名刹。各選義師。董願學之子弟而減俸餼之。今日詩云。子曰。安知他年非譽髦斯士。公之作人遠矣。豈簿書筐篋之吏所能爲乎。逮公像入祠。矩步方幅。卯角佩觿者。悉炷瓣香。而有誰嗣之痛也。哀哉。

禁飲博

藏疾匿瑕。墮頭肆郎爲甚。高陽徒侶。羣聚鯨吞。鼠牙雀角。尤便胥役。一入其中。輒傾中人之產。至梟盧徵逐。蟻聚蠅攢。卜晝卜夜。呼么喝六。不材之子。傾家蕩產。傷風敗俗。沒身不悔。而歷任如某某。反以明禁與市傭爲市。嗚呼。此風得不日長乎。公至則立法嚴禁。茶坊酒肆。斥逐無遺。賭窩博場。誅及鄰保。深夜躬行。